

Samþykkt fyrir fræðsluráð

Um verkefni fræðsluráðs

1. gr.

Fræðsluráð fer með stjórn leikskóla, grunnskóla og Tónlistarskólans á Akureyri samkvæmt lögum og reglugerðum um þá í umboði bæjarstjórnar Akureyrar eftir því sem nánar er kveðið á um í þessari samþykkt sem gerð er í samræmi við Samþykkt um stjórn og fundarsköp Akureyrarkaupstaðar. Orðið skóli vísar hér á eftir til allra áðurgreindra skóla.

2. gr.

Fræðsluráð gerir tillögu til bæjarstjórnar um stefnumörkun á sviði skólamála Akureyrarbæjar. Ráðið fylgist með því að skólarnir vinni að settum markmiðum, veiti góða þjónustu og starfsemin sé skilvirk og hagkvæm.

3. gr.

Fræðsluráð

- a) hefur eftirlit með að öll börn á Akureyri njóti lögboðinnar fræðslu og umönnunar. Í störfum sínum ber fræðsluráði að vinna að því að allir nemendur njóti sem bestar aðstöðu og jafnastra tækifæra til náms og að skólinn veiti sérhverjum nemanda fræðslu og umönnun eftir aldri sínum og þroska og í samræmi við gildandi aðalnámskrár á hverjum tíma,
- b) hefur eftirlit með skólaþjónustu leik- og grunnskóla en í henni felst annars vegar stuðningur við nemendur og fjölskyldur þeirra og hins vegar stuðningur við starfsemi leik- og grunnskóla og starfsfólk þeirra,
- c) hefur eftirlit og umsjón með málefnum dagforeldra
- d) staðfestir starfsáætlun allra skóla sveitarfélagsins,
- e) fylgist með framkvæmd náms og kennslu í sveitarfélaginu og gerð skólanámskrár og gerir tillögur til skólastjóra og/eða bæjarstjórnar um umbætur í skólastarfi,
- f) stuðlar að tengslum og samstarfi leikskóla og grunnskóla annars vegar og grunnskóla og framhaldsskóla hins vegar,
- g) hefur eftirlit með að jafnan sé fyrir hendi fullnægjandi húsnæði og annar útbúnaður. Fræðsluráð, ásamt skólastjórum, lítur eftir að uppfylltar séu kröfur laga og reglugerða á þessu sviði og gerir tillögur til bæjarstjórnar um úrbætur,
- h) gerir tillögu til bæjarstjórnar um skipulag skólamála í bænum,
- i) hefur eftirlit með og stuðlar að því að skólum sé tryggður aðgangur að sérfræðiþjónustu í samræmi við gildandi lög og reglugerðir,
- j) hefur eftirlit með að ákvæði laga og reglugerða séu uppfyllt og gerir tillögur til bæjarstjórnar um úrbætur,
- k) lætur mennta- og menningarmálaráðuneyti í té upplýsingar um framkvæmd skólahalds, innra mat skóla, ytra mat sitt, framgang skólastefnu sinnar og áætlanir um umbætur,
- l) hefur eftirlit með skólatengdu starfi sem veitt er í skólunum utan skólatíma svo sem Frístund fyrir börn í 1. – 4. bekk í grunnskóla og fatlaða nemendur 10 – 16 ára,
- m) hefur eftirlit með skólaakstri nemenda,
- n) hefur eftirlit með að til séu sem gleggstar upplýsingar um skólamál í sveitarfélaginu og að bæjarbúar hafi aðgang að upplýsingum um þá þjónustu sem í boði er,

4. gr.

Fræðsluráð hefur eftirlit með framkvæmd eftirfarandi laga og reglugerða byggðra á þeim, eins og þau eru á hverjum tíma og að því marki sem lögin setja skyldur á herðar sveitarfélaga:

- a) grunnskólalög nr. 91/2008
- b) lög um leikskóla nr. 90/2008
- c) lög um menntun og ráðningu kennara og skólastjórnenda við leikskóla, grunnskóla og framhaldsskóla nr. 87/2008
- d) lög um fjárhagslegan stuðning við tónlistarskóla nr. 75/1985,
- e) reglugerð nr. 907/2005 um daggæslu barna í heimahúsum og
- f) önnur lög og reglugerðir sem á hverjum tíma tengjast verkefnum ráðsins.

5. gr.

Fræðsluráð starfar í samræmi við:

- a) reglur, samþykktir og samþykktar stefnur bæjarstjórnar sem tengjast sérstaklega verkefnum ráðsins svo sem skólastefnu Akureyrarbæjar og
- b) almennar reglur, samþykktir og stefnur bæjarstjórnar svo sem mannauðsstefnu Akureyrarbæjar og jafnréttisstefnu Akureyrarbæjar.

6. gr.

Fræðsluráð getur veitt styrki til verkefna innan málaflokksins í samræmi við Reglur um styrkveitingar Akureyrarkaupstaðar. Skulu slíkar styrkveitingar að jafnaði fara fram tvisvar á ári.

Um skipan fræðsluráðs

7. gr.

Bæjarstjórn skal á fyrsta fundi að afloknum bæjarstjórnarkosningum kjósa fimm fulltrúa í fræðsluráð til fjögurra ára og fimm til vara. Bæjarstjórn kýs formann og varaformann. Framboðslisti sem fulltrúa á í bæjarstjórn en ekki í fræðsluráði má tilnefna áheyrnarfulltrúa til setu í fræðsluráði með málfrelsi og tillögurétt. Áheyrnarfulltrúa er heimilt að tilnefna varamann í forföllum sínum.

8. gr.

Formaður fræðsluráðs stjórnar fundum og sér um að allt fari þar löglega og skipulega fram. Hann úrskurðar í ágreiningsmálum sem upp kunna að koma út af fundarsköpum en skjóta má úrskurði hans til úrlausnar ráðsins. Fundarmönnum er skylt að lúta valdi formanns að því er varðar fundarsköp og góða reglu.

9. gr.

Fræðsluráð heldur að jafnaði tvo fundi í mánuði. Aukafundi skal halda eftir þörfum að ákvörðun formanns eða ef a.m.k. tveir nefndarmenn óska þess.

10. gr.

Sviðsstjóri fræðslusviðs situr að jafnaði fundi fræðsluráðs með málfrelsi og tillögurétt. Auk þeirra eiga eftirtaldir rétt til setu á fræðsluráðsfundum með sömu skilyrðum:

- a. einn fulltrúi grunnskólastjóra,
- b. einn fulltrúi kosinn úr hópi fastráðinna kennara sömu skóla,
- c. einn fulltrúi foreldra, sbr. 13. gr. laga um grunnskóla nr. 91/2008.
- d. einn fulltrúi leikskólastjóra,
- e. einn fulltrúi úr hópi starfsmanna leikskólanna,
- f. einn fulltrúi tilnefndur af samtökum foreldra barna í leikskólum,
- g. leikskólafulltrúi
- h. forstöðumaður rekstrarsviðs

Skólastjóri tónlistarskólans situr fundi ef málefni tónlistarskólans eru til umfjöllunar.

Heimilt er að boða aðra á fundi ráðsins til viðræðna um tiltekin mál.

Um yfirstjórn málefna fræðsluráðs

11. gr.

Bæjarstjóri ræður sviðsstjóra fræðslusviðs að höfðu samráði við fræðsluráð. Sviðsstjóri fræðslusviðs að höfðu samráði við fræðsluráð ræður, í umboði bæjarstjórnar, skólastjóra grunnskóla, sbr. lög um grunnskóla nr. 91/2008, og leikskólastjóra, sbr. lög um leikskóla nr. 90/2008, og aðra stjórnendur sem undir hann heyra. Sviðsstjóri fræðslusviðs, skólastjórar og forstöðumenn ráða aðra starfsmenn.

12. gr.

Bæjarráð úthlutar fjárhagsramma til ráðsins vegna fjárhagsáætlunar fyrir næsta starfsár. Fræðsluráð gerir starfsáætlun í samræmi við fjárhagsáætlun fyrir næsta starfsár vegna málaflokks síns. Tillögur um breytingar á þjónustu skal skýra og rökstyðja sérstaklega og þurfa samþykki bæjarstjórnar. Breytingar á gjaldskrá þarf að samþykkja í bæjarráði.

Sviðsstjóri fræðslusviðs leggur fram í ráðinu tillögu að fjárhagsáætlun málaflokks fræðsluráðs sem ráðið skal meta og staðfesta að sé í samræmi við starfsáætlun og markaða stefnu.

13. gr.

Formaður fræðsluráðs er í forsvari fyrir fræðsluráð um stefnumótun og ákvarðanir þess eftir því sem við á. Sviðsstjóri fræðslusviðs ber ábyrgð á stjórn og rekstri málaflokksins, þ.m.t. fjármálum, starfsmannamálum og framkvæmd ákvarðana ráðsins.

Um fundarsköp fræðsluráðs

14. gr.

Um fundarsköp á fundum fræðsluráðs gilda ákvæði sveitarstjórnarlaga og Samþykktar um stjórn og fundarsköp Akureyrarkaupstaðar og verklagsreglur um fundarritun.

Formaður boðar eða lætur boða til fundar með dagskrá. Í dagskrá skal vísað til gagna um þau fundarefni sem til umfjöllunar eru eftir því sem kostur er. Dagskrá skal send til aðalmanna í síðasta lagi tveimur sólarhringum fyrir fund. Hægt er að boða til fundar með styttri fyrirvara með samþykki allra nefndarmanna og skal það bókað í upphafi fundar. Óski nefndarmaður eftir að taka mál á dagskrá skal hann tilkynna formanni það skriflega eða með rafrænum hætti með tillögu eða fyrirspurn eigi síðar en á hádegi þremur dögum fyrir fund. Heimilt er að taka mál til meðferðar í fræðsluráði þótt ekki sé það tilgreint í dagskrá. Þó er skylt að fresta afgreiðslu slíks máls ef einhver nefndarmaður óskar þess.

Fundir fræðsluráðs eru að jafnaði haldnir fyrir luktum dyrum og er óheimilt að greina frá ummælum einstakra fundarmanna á fundum. Fundur er lögmætur ef meira en helmingur kjörinna nefndarmanna er á fundi. Fræðsluráð getur enga bindandi ályktun gert nema fundur sé lögmætur.

Mál skulu tekin til umræðu og afgreidd í þeirri röð sem þau eru á dagskrá nema formaður eða fræðsluráð ákveði annað. Afl atkvæða ræður úrslitum mála. Skylt er að vísa máli til úrskurðar bæjarstjórnar ef a.m.k. tveir nefndarmenn óskar eftir því með bókun.

Formaður sér um að fundargerðir séu skipulega færðar í gerðabók og í tölvu og að allar samþykktir séu bókaðar nákvæmlega.

15. gr.

Fræðslusvið leggur fræðsluráði til fundaraðstöðu og fundarritara. Um ritun fundargerða fræðsluráðs gilda sömu reglur og um ritun fundargerða bæjarstjórnar, sbr. 16. gr. og 31. gr. samþykktar um stjórn og fundarsköp Akureyrarkaupstaðar og verklagsreglur um fundarritun.

Ritari fræðsluráðs skal færa í gerðabók númer fundar, hvar og hvenær fundurinn er haldinn og að fundargerð sé færð í tölvu. Þá skal færa í gerðabók upphafstíma fundar, fundarslit í hve mörgum dagskrárliðum fundargerð er og á hve mörgum blaðsíðum tölvuskráða fundargerðin er. Viðstaddir fundarmenn skulu rita nöfn sín í gerðabók í fundarlok og áheyrnarfulltrúar þar á eftir.

Í tölvuskráða fundargerð skal færa

- a) fundartíma og fundarstað,
- b) nöfn aðalmanna og varamanna sem sækja fundinn og fyrir hvaða aðalmenn varamenn sitja fundinn,
- c) nöfn starfsmanna sem sækja fundinn,
- d) heiti og númer fundarefna sem tekin eru fyrir,
- e) greinargóða lýsingu á hverju fundarefni,
- f) bókanir ráðsins eða einstakra fundarmanna um fundarefni þar sem það á við
- g) að fundarmaður hafi vikið af fundi eða komið til fundar eftir að hann hófst, ef svo ber undir.

Í lok fundar skal tölvuskráð fundargerð prentuð og hún undirrituð af fundarmönnum. Einnig skal formaður og a.m.k. einn fundarmanna úr minnihluta setja upphafsstafi sína undir hverja blaðsíðu fundargerðar sem tölusettar skulu í áframhaldandi töluröð. Undirritaðar tölvuskráðar fundargerðir skulu reglulega bundnar inn til varanlegrar varðveislu.

Undirritaðar fundargerðir skulu varðveittar hjá skjalasafni Akureyrarbæjar. Stjórnsýslusvið sér um að birta fundargerðir á vefsíðu Akureyrarbæjar. Sviðsstjóri fræðslusviðs sér um að tilkynna aðilum mála, sem afgreidd eru í fræðsluráði, um málalok.

Um hæfi og skyldur fræðsluráðsmanna og annarra fundarmanna

16. gr.

Um hæfi fræðsluráðsmanna gilda ákvæði 20. gr. sveitarstjórnarlaga nr. 138/2011, II. kafla stjórnsýslulaga nr. 37/1993 og 17. gr. samþykktar um stjórn og fundarsköp Akureyrarkaupstaðar.

Um hæfi starfsmanna fræðsluráðs gilda ákvæði 20. gr. sveitarstjórnarlaga nr. 138/2011 sbr. II. kafla stjórnsýslulaga nr. 37/1993 og 17. gr. Samþykktar um stjórn og fundarsköp Akureyrarkaupstaðar.

17. gr.

Nefndarmönnum er skylt að sækja alla fundi fræðsluráðs nema lögmæt forföll hamli svo sem önnur brýnni skyldustörf eða veikindi. Sé fræðsluráðsmaður forfallaður um stundarsakir skal hann tilkynna eða láta tilkynna forföllin til formanns og boða varamann sinn á fund.

Nefndarmaður skal gæta þagnarskyldu um það sem hann fær vitneskju um í starfi sínu og leynt á að fara vegna einka- eða almannahagsmuna samkvæmt lögum eða eðli máls. Þagnarskylda helst áfram eftir að nefndarmaður lætur af þeim störfum. Þetta ákvæði á einnig við um aðra fundarmenn.

Málsmeðferðareglur fræðsluráðs

18. gr.

Við meðferð mála hjá fræðsluráði, er varða rétt og skyldu aðila að stjórnáskilumáli, skulu nefndarmenn og starfsmenn gæta ákvæða stjórnáskilulaga nr. 37/1993.

Fræðsluráð skal gæta að leiðbeiningarskyldu varðandi þau erindi sem eru til meðferðar hjá ráðinu. Þá skulu ákvarðanir vera teknar svo fljótt sem unnt er eftir að mál hefur verið nægjanlega upplýst.

Við úrlausn mála skal gæta samræmis, jafnræðis og meðalhófs skv. stjórnáskilulögum nr. 37/1993.

Aðili máls skal eiga þess kost að tjá sig um efni máls fyrir starfsmönnum fræðsluráðs áður en tekin er ákvörðun enda liggi ekki fyrir í gögnum málsins afstaða hans og rök. Aðili máls á rétt á því að kynna sér skjöl og önnur gögn er varða mál hans með þeim takmörkunum sem getið er um í 16. gr. stjórnáskilulaga nr. 37/1993 og upplýsingalögum nr. 140/2012.

Ákvörðun fræðsluráðs skal tilkynnt aðila máls. Hafi umsókn aðila verið hafnað eða ekki tekin til greina að öllu leyti skal fylgja tilkynningunni rökstuðningur eða leiðbeiningar um heimild aðila til að fá ákvörðun rökstudda. Einnig skulu fylgja leiðbeiningar um kærueimild og kærufrest.

Heimildir til fullnaðarákvarðana

19. gr.

Fræðsluráði er heimilt að afgreiða án staðfestingar bæjarstjórnar mál á verksviði hennar ef

- a) lög eða eðli máls mæla ekki sérstaklega gegn því,
- b) þau varða ekki fjárhag sveitarfélagsins umfram það sem kveðið er á um í starfs- og fjárhagsáætlun
- c) þau víkja ekki frá stefnu bæjarstjórnar í veigamiklum málum.

21. gr.

Sviðsstjóri fræðslusviðs afgreiðir án staðfestingar fræðsluráðs ráðningar skólastjóra sbr. 11. gr., samninga til eins árs sem eru í samræmi við starfsáætlun ráðsins,

- a) leyfi fyrir skólavist í öðrum sveitafélögum,
- b) leyfi fyrir skólavist nemenda í skólum á Akureyri sem eiga lögheimili utan Akureyrar,
- c) leyfi fyrir rannsóknum í skólum,
- d) umsóknir um launalaus leyfi,
- e) umsóknir um leikskólavist,
- f) umsóknir um tíma vegna sérkennslu í leik- og grunnskólum og aðra sérþjónustu,
- g) leyfi fyrir leikskólavist í öðrum sveitafélögum,
- h) leyfi fyrir leikskólavist í leikskólum Akureyrar fyrir börn sem eiga lögheimili utan Akureyrar,
- i) leyfi til daggæslu barna í heimahúsum,
- j) önnur mál sem fræðsluráð felur sviðsstjóra fræðslusviðs að afgreiða.

Bæjarstjórn setur reglur um afgreiðslu ofangreindra mála. Mál sem sviðsstjóri fræðsluviðs afgreiðir í umboði fræðsluráðs skulu kynnt fræðsluráði með skriflegri skýrslu a.m.k. einu sinni á ári.

Endurupptaka máls

22. gr.

Eftir að fræðsluráð eða starfsmenn þess hafa tekið ákvörðun og hún verið tilkynnt, á aðili máls rétt á því að mál sé tekið fyrir að nýju ef ákvörðun hefur byggst á ófullnægjandi eða röngum upplýsingum um málsatvik eða ef íþyngjandi ákvörðun um boð eða bann hefur byggst á atvikum sem hafa breyst verulega frá því að ákvörðun var tekin. Endurupptaka er heimil innan þriggja mánaða frá því að aðila máls var eða mátti vera kunnugt um ákvörðunina.

Aðili máls skal beina kröfu um endurupptöku máls til bæjarráðs.

Stjórnsýslukæra

23. gr.

Aðila máls er heimilt að kæra ákvörðun fræðsluráðs eða starfsmanna þess til æðra stjórnvalds sem við á til þess að fá ákvörðun fellda úr gildi eða henni breytt nema annað leiði af lögum eða venju.

Kæra skal borin fram innan þriggja mánaða frá því að aðila máls var tilkynnt um ákvörðun ráðsins eða starfsmanna þess, nema lög leiði til annars frests. Stjórnsýslukæra frestar ekki réttaráhrifum ákvörðunar meðan málið er til meðferðar nema æðra stjórnvald mæli svo fyrir.

Gildi samþykktarinnar

24. gr.

Samþykkt þessi tekur gildi með staðfestingu bæjarstjórnar 20.7.2017.